

AWIG-AWIG DESA ADAT POH



**DESA ADAT POH
DESA BHUANA GIRI, KECAMATAN BEBANDEM
KABUPATEN KARANGASEM**

ARAN LAN WEWIDANGAN DESA

- 1) Desa Adat puniki mawasta Desa Adat Poh, Banjar Dinas Poh, Desa Bhuana Giri, Kecamatan Bebandem, Kabupaten Karangasem, Provinsi Bali. (Kode Pos 80861)
- 2) Wates Desa Adat Poh Nyatur:
Ha : Sisin wetan, Apit Pangkung sareng pangkung paku.
Na : Sisin Kidul, Wates abian I Nyoman Nama, sareng Pangkung Bancang Sidem.
Ca : Sisin Kulon. Pangkung Jabon sareng Pangkung Kawah.
Ra : Sisin Lor. Wates Alas Cunung Agung sareng Margi Mantri.
- 3) Desa Adat puniki kawangun antuk asiki banjar adat sareng asiki Banjar Dinas Poh.

PETITIS LAN PEMIKUKUH

- 1) Desa Adat Poh kemanggehang antuk minakadi :
Ha : Pancasila
Na : Undang-undang Dasar 1945
Ca : Tri Hita Karana manut sada cara Agama Hindu

SUKERTA TATA PAKRAMAN

- 1) Indik Krama :
Ha : Sane dados krama desa inggih punika keluarga sane meagama Hindu saha ngamong karang desa. utawi jumenek ring wewidangan Desa Adat Poh.
Na : Yening wenten tamiu sios ring Agama Hindu nenten kedadosang megenah utawi makrama ring Desa Adat Poh. Sios punika nenten keicenin numbas utawi nyewa utawi ngade ring wewidangan Desa Adat Poh.
Ca : Yening krama desa sampun jangkep alaki rabi utawi mapikuren patut nyarengin mekrama desa.
Ra : Yening wenten krama desa sane madruwe petajuh tur maning petajuh ipun sampun mapikuren kedadosang keni ayah asiki.
Ka : Yening wenten krama sane madruwe sentana, utawi petajuh tur maning ipun sampun kalintang lingsir, ipun kadadosang nenten malih ngayah ring Desa Adat Poh.
Da : Yening wenten krama sane sampun polih nyarengin mekrama desa rarisi ipun ngelad utawi usan mekrama, rarisi benjang pungkur malih mewali nyarengin mekrama. Ipun kakeninin pamidanda beras akehnyane satus kilo. Tur maning yening madruwe kepademan rarisi ketanem ring setra Adat Poh, keni penumbbras Setra akehnyane satak kilo beras.
Ta : Yening wenten krama sane nenten polih ngeled utawi usan mekrama megenah ring dura desa rarisi ipun madrue sentana, yening benjang pungkur malih mewali ipun kakeninin beras seket kilo.
Sa : Yening wenten krama tamiu Agama Hindu sane jaga nyarengin mekrama desa. patut katureksain turmaning kakeninin beras akehnyane siu kilo.
Wa : Yening wenten sentana krama desa sane sampun jangkep mapikuren, nanging ipun magenah ring dura desa utawi ngrereh pakaryan ring desa siosan. ipun kantun

kaiket pinaka warga utawi krama Desa Adat Poh sakewanten ipun kakenini beras akehnyane seket kilo nyabran awarsa/atiban. Yening nenten keaturang ping tiga pacang kelad utawi nenten kedadosang mekranma malih ring Desa Adat Poh.

La : Yening wenten jatma sios desa jagi numbas tanah ring wewidangan Desa Adat Poh. patut nyarengin mekrama ring Desa Adat Poh.

Ma : Yening wenten krama desa sane sampun polih madesa ring Desa Adat Poh rarisi mageneh ring Desa Adat siosan yening madrue kepademan utawi sawo rarisi ketanem ring Desa Adat Poh pacang kekenenin panumbas setra akehnyane satak kilo beras turmaning kakenenin pabersihan ring pura desa.

Ga : Yening wenten krama desa sane usan mekrama desa wit sangkaning katundung olih krama desa yening madruwe kepademan utawi sawo rarisi ketanem ring Desa Adat Poh pacang kakenenin panumbas setra akeh ipun samas kilo beras taler kakenenin panelas upacara sane kemargiang ring desa.

Ba : Krama sane nenten sareng medesa adat ring Poh yening jagi nyarengin upacara ngaben ring Poh kakeninin beras limang kilo.

PRAJURU LAN DULU DESA

- 1) Desa Adat Poh kaenter antuk bendesa adat utawi kelian desa adat.
- 2) Banjar adat kaenter antuk Kelian Banjar.
- 3) Bendesa lan Kelian Banjar patut :
Ha : Mawiwit sakeng krama ngarep
Na : Malarapan antuk keturunan
- 4) Bendesa utawi kelian desa kesanggra antuk :
Ha : Penyarikan
Na : Juru raksa. pinaka pengamong duen desa.

INDIK KUL-KUL

- 1) Kul - Kul ring desa luire :
Ha : Kul - kul Desa
Na : Kul - kul Banjar
Ca : Kul – kul sekaa – sekaa.
- 2) tabuh tatepakan kul-kul :
Ha : Atuludan lamban. inggih punika katengeran tedun ngayah.
Na : Kalih tilud bulus. wenten kaicalan.
Ca : Tigang tulud bulus. wenten pengrancaban.

Uger-uger Nepak Kul-kul :

- 1) Kul - kul desa utawi banjar tan wenang katepak yening tan sangkaning pituduh desa, sajabaning tengeran kapancabayan.
- 2) Sane nepak tan sangkaning pituduh desa, tan kabuatan panepake wenang sang mamurug kadanda beras selae kilo (25 kg).
- 3) Kul - kul sekaa-sekaa tan wenang kasewerin antuk kul - kul pondokan.

INDIK DRUWEN DESA

- 1) Padruwen Desa Adat Poh sekadi ring sor :

Ha : Kahyangan desa luire:

- a) Kahyangan tiga (3)
- b) Pemaksan Ageng. Pura Puncak Sari
- c) Pemaksan alit, Pura Apit Tukad

Na : Tanah tegalan

Ca : Tanah ayahan desa

Ra : Setra ageng, Setra Alit

Ka : Alas payuk

Da : Ilen-ilen Sang Hyang Dedari

Ta : Sekaa Santhi

Ha : Saking pelaba pura

Na : Iuran krama desa

Ca : Paican saking Guru Wisesa

Ra : Dana punia tiosan sane patut.

SUKERTA TATA AGAMA

INDIK DEWA YADNYA :

- 1) Palinggih Panyiwian sawidangan Desa Adat Poh, luire :

Ha : Kahyangan Tiga (Pura Puseh, Pura Desa, Pura Dalem)

Na : Pura Pemaksan.

- 2) Rahina piodalan soang-soang kahyangan :

Ha : Pura Desa rikala Purnama Kasa

Na : Pura Puseh rikala Purnama Kedasa

Ca : Pura Dalem rikala Buda Kliwon Gumbreg

Ra : Pura Pemaksan Ageng Puncak Sari rikala rahina Tumpek Landep

Ka : Pura Pemaksan Alit rikala rahina Purnama Dyesta

Da : Pura Subak Wana Asri ring rahina Buda Wage Kelawu, nyabran awarsa turmaning ngebekinutawi ngerainin nyabran 6 sasih.

UPACARA LAN UPAKARA NGEMANUTIN PANCA YADNYA

1) DEWA YADNYA

Ha : Dewa Yadnya ring kahyangan tiga inggih punika:

- a) Ring Puseh/nyabran awarsa inggih punika nuju purnama sasih kedasa
- b) Ring Desa/nyabran awarsa inggih punika nuju purnama sasih kedasa, kelanturang upacara pangusabaan nng pumama Sasih kasa, sios punika kewentenang taler upacara mangkon/metamyu, nyabran Purnama Kesanga.
- c) Ring Dalem

Upacara piodalan ring dalem kawentenang nyabran awarsa inggih punika nuju rahina Buda Keliwon Gumbreg turmaning kawentenang taler upacara ngebekin nyabran nem sasih ring rahina sane pateh.

Na : Dewa Yadnya ring Pura Pemaksan Ageng/Puncak Sari

- a) Upacara piodalan kemargiang nyabran nem sasih inggih punika ring rahina Tumpek landep turmaning kemargiang upacara ngenaininnyabran Tumpek krulut.
- b) Upacara pangusabaan kemargiang yening rahina Tumpek Landep nemu Purnama Sasih Kapat.
- c) Upacara Dewa Yadnya ring Parhyangan Subak Abian Wana Asri kemargiang nyabran awarsa rahina Buda Wage Kelawu miwah kemargiang upacara ngebekin nyabran nemu sasih ring rahina sane pateh.

2) PITRA YADNYA

Ha : Yening wenten kepademan ring sedulun puseh rarisi ngupacara rain ngantos nuwusang ring genah ipun presida kakeninin pebersihan ring Pura Puseh banten pebengkit miwah sejangkep nyane.

Na : Pemargin Upacara Pitra Yadnya utawi ngaben ngemanutin pemargin ring dadia nyane soang-soang.

Ca : Pemargin Upacara Pitra Yadnya nenten wenang nunjel bangke utawi sawa matah ngemanutin dresta sane sampun memargi turun temurun ngemanutin kewentenan linggih Ida Betara ring Puncak Sari.

3) BHUTA YADNYA

Ha : Sane kemargiang ring Pura Puseh miwah Desa

- a) Manca Sata kemargiang nyabran awarsa selantur nyane kemargiang Upacara Manca Kelud nuju Tilem Keenem.

Na : Sane Kemargiang ring Pura Dalem

- a) Manca Kelud kemargiang nyabran awarsa nuju Tilem Kapitu

Ca : Sane kemargiang ring Pura Pemaksan Puncak Sari

- a) Manca Kelud kemargiang nyabran awarsa nuju Tilem Kawulu

Ra : Sane kemargiang ring Pura Banjar Adat

- a) Manca Kelud nyabran awarsa nuju Tilem Kesanga miwah kemargiang Upacara Tawur Agung nyabran limang warsa ring galah sane pateh.
- Ka : Upacara Bhuta Yadnya ring Parhyangan Subak Abian Wana Asri kemargiang nyabran awarsa nuju Tilem Kawulu.
- Da : Upacara Bhuta Yadnya sane kemargiang ring pekubon utawi jro soang-soang krama dados kemargiang risampune kemargiang Caru Pemungkah ring Pura Desa lan Desa Adat Poh.

INDIK KEPEMANGKUAN

- 1) Ngadegang pemangku manut dudonan
Ha : Nyanjan utawi masemurang, soang-soang mapiteges mapinunas ring ajeng penataran wiadin kepura desa utawi ring balian sonteng, lan sepenunggil nia.
Na : Turunan utawi ngwaris
- 2) Tan kawenang keanggen pemangku saluiring :
Ha : Cendangga luiring:
 - a) Peceng
 - b) Perot
 - c) Cungih
 - d) Sareng sepenunggilnyane
Na : Sane madrebe kesucian urip tan becik.
- 3) Prebea kepemangkuhan
Ha : Mediksa widhi utawi mewintenin kelaksanayang antuk sang ngadegang mekadi krama desa utawi pengempon pura soang-soang.

SWADARMA NING PEMANGKU, Luire :

- Ha : Ngerterang upacara piodalan ring kahyangan utawi ring pekubon krama.
- Na : Tan wenang salab-sulub, yen mamurung wenang pemangku inucap nyapuhin raga.
- Ca : Prade silih sinunggil pemangku kapialang, utawi cuntaka kengin nyuelang pemangku siosan utawi nuur sang sulinggih.
- Ra : Semalih yen sampun pemangku ngayah tigang rahina ring pura, kancit wenten keluarganyane lina utawi padem, pemangku inucap tan kenen cuntaka, sane wenten pemangku inucap tan budal salami piodalan.
- Ka : Tan kewenangan mebwos kasar, bangras utawi nyula karna
- Da : Sahananin pemargi mangda prasida dados tinutan utawi pembimbing umat sedarma
- Ta : Tan wenang ngajengang utawi meinum-inuman sane nenten becik minakadi arak, tuak miwah sane tiosan sane sida ngewetuung bencana.
- Sa : Patut banban alus rikala nguduhang krama utawi umat sajeroning nabdabang yadnya utawi sejangkep nyane.

PATIYAS UTAWI OLIH-OLIHAN PEMANGKU,Luire :

Ha : Luput pekaryan lan rerampen utawi reramon, sakewanten pedagingan keni manut sekadi sane patut.

- 1) Pemangku kegentosin riantukan :

Ha : Lina

Na : Pinunas ngeraga menawi kegeringen utawi sampun kelintang lingsir

Ca : Keusanang antuk krama menawi melaksana sane tan patut

Ra : Prade pemangku kausanang sangkaning melaksana tan patut keni pamidanda manut perarem.

KASUKERTAN KAHYANGAN RING DESA

1) Sane nenten kelugra ngranjing kepura luire :

Ha : Sang ketiben cuntaka. mekadi sebel raga:

- a) Sebel kandel, ngraja suala salami dereng mabersih
- b) Sebel madue putra, sejeroning petang dasa dua rahina
- c) Sebel pengantenan. sedeng mabiya kala
- d) Sebel sangkaning kepademan manut sengker Luire:
 - 1. Yening anak lingsir padem sebelnyane tigang rahina
 - 2. Yening anak alit padem sedurung tigang sasih sebelnyane pitung rahina
 - 3. Yening rare sane durung kepus pungsed padem sebelnyane solas rahina.
- e) Yening wenten kepademan para kramane nenten kedadosang ngranjing kepura, nanging yening wenten odalan utawi upacara ring pura kawenanggang sebel akuren.

Na : Makta sahaning sane mresidayang ngletehin

Ca : Wewalungan suku pat sejawaning rikala mapada

Ra : Mabusane sane patut kadi tatakramaning ngranjing kepura

Ka : Anak alit sane dereng mayusa tigang sasih.

2) Sane nenten kelugra busana ngranjing kepura :

Ha : Ritatkala ngaturang ayah patut mabusana jangkep

3) Parilaksana sane tan patut kawenanggang ring pura:

Ha : Mesuara sane kesinanggeh wak purusa. wak capala

Na : Mekoratan, mebacin, mewarikh, masenggama, (yening wenten krama sane mamurub pacang kakeninin pamidanda ngresigana utawi mresihin pura).

Ca : Mesumpah utawi mecoran

Ra : Ngiyas raga sajawaning pandita miwah pinandita.

Ka : Munggah tedun ring pelinggih nenten kedadosang, sajawaning pituduh prajuru desa.

Sang memurug kadi kecaping ring ajeng keni pamidanda manta pararem.

SUKERTA PAWONGAN

INDIK PAWIWAHAN :

- 1) Pawiwanan inggih punika patemuning purusa, predana mlarapan penunggalan kayun, suka cita kedulurin upa saksi sekala niskala
- 2) Pemargin pawiwanan, Luire:
Ha : Pepadikan
Na : Ngrorod
Ca : Nyeburin utawi nyentana
- 3) Pawiwanan sane kepatutang ring desa inggih punika :
Ha : Sampun kemargiang prabea kala utawi kesaksiang sekala niskala antuk pandhita utawi pinandhita.
Na : Wenten pesaksi prajuru sane mapikelingan utawi ngelikitayang pawiwanan.
Ca : Yening wenten anak istri saking Desa Adat Poh mangkat kedura desa utawi Desa Adat siosan panepak utawi paswaran kakeninin pamidanda akehnyane beras 25 kg.

KARANG LAN TEGAL DUWEN DESA

- 1) Yening krama sane ngamong tanah duwen desa patut keni beras manut pararem
- 2) Yening krama sane ngamong tanah duwen desa patut nganutin uger-uger inggih punika :
Ha : Tan kedadosang ngadol
Na : Tan Kedadosang ngadeang
Ca : Tan dados mesakapang ring sios desa
Ra : Tanah sane keamong olih sinunggil krama nenten kedadosang keamong malih olih krama desa sane siosan, tanah druwe inucap pacang kewarisang keperti sentana nyama turun temurun.
Ka : Tanah sane keamong utawi keayahang nenten dados desa pacang ngugemin, yening krama inucap nenten meduwe keiwangan ring desa adat.
Da : Yening wenten krama sane mamurung pamuput puniki nenten kedadosang malih mekrama desa.

INDIK JINAH DUWEN DESA

- 1) Jinah druwen desa inggih punika :

Ha : Jinah sangkepan

Na : Jinah wantuan saking guru wisesa

Sukerta jinah Druwen Desa :

- 1) Yening wenten krama sane nyelang jinah duwen desa patut nganutin uger-uger inggih punika :
Ha : Yening pianak jinah nenten ketaur pacang ketikelang
Na : Yening sampun pang tiga nenten ketaur pacang kerareanang dados krama
Ca : Yening sampun prasida ketaur malih kedadosang mekrama
Ra : Yening nyelang jinah sangkepan nenten dados rangkungan ring ajuta rupiah
Ka : Yening nyelang jinah wantuan saking guru wisesa minakadi (Jinah LPD, CBD miwah sane siosan nenten dados rangkungan ring limang yuta rupiah).
Da : Yening wenten krama desa sane pacang nyelang jinah druwen desa patut mapisedek ring keluargannyane.

INDIK PAMIDANDA

- 1) Desa utawi banjar wenang niwakang pamidanda ring warga desa sane sisip

- 2) Peniwak inucap kemargiang oilih bendesa utawi kelian banjar

- 3) Bacakan pamidanda, luire:

Ha : Ayahan panakan kasisipan

Na : danda artha (Dosa, danda saha penikel peturunan)

Ca : Rerampangan

Ra : Kedaut Karang ayahannya, utawi kasepekan

Ka : Kewaliang pipilnyane (Keusanang mekrama)

- 4) Pamidanda sane katiwakang patut masor singgih manut ring kesisipane

- 5) Jinah utawi raja brana pamidanda ngranjing dados druwe desa utawi banjar

- 6) Krama sane langkung ring tigang paruman ngek/lantur tan naur urunan miwah dedandan wenang kerampag.

- a) Rerampagan ngangge tatacara kadi ring sor :

Ha : Kelaksanayang antuk prajuru kesarengin antuk krama desane tigang diri pinaka saksi

Na : Sang ngrampag saking darsana ngambil barang utawi nyawenin tanem tuwuuh, akehnyane manut ring utang sang kerampag

Ca : Prajuru miteketang mangda barang-barang sane kerampag digelis ketebus, masengker awuku ring arahina pacang kadol

Ra : Tan ngeninin seluir barang sane patut inggilang manut agama miwah mademang pengupa jiwa sang kerampag.

- b) Prade sang pacang ngrampag ngrampag ngalangin pemargi inucap mawastu sampun nenten nganutin awig-awig desa wenang karang desa sane kagenahin kedaut antuk desane utawi kasepekang.

- c) Samalih yan purun taler ngalangin pemargi kadi ring ajeng tan wenten pamargin sejabaning kewaliang pipilnyane utawi keusanang mekrama
- d) Pamidanda inucap ring ajeng keni buntas risampun kekeninin Minakadi :
Ha : Nunas gengsinampura ring krama desa rihantukan nguwak pasubayan utawi paruman pecak
Na : Nawur pengargan penguwak pasubayan dukpacang kerampag kedulurin perascita .

WICARA LAN PAMIDANDA

- 1) Sane wenang maosin mekadi mutusang wicara ring desa inggih punika prajuru desa sinanggeh kerta desa.
Ha : Kelian banjar lan desa adat tunggalan riantukan Desa Adat Poh nunggal dados asiki banjar adat, banjar dinas rauhing desa adat.
Na : Yening nenten prasida kepuputang ring desa adat pacang kalintangang ring manggala guru wisesa.

**PAMIDANDA
MAJENG RING KRAMA
SANE NGRUSAK SUKERTA DESA**

Ha : Krama sane ngrusak utawi ngemaling druwen pura, minakadi pratima, sekar miwah sane siosan pacang ketundung turmaning nenten kedadosang mewali malih mekrama desa ring Desa Adat Poh.

Na : Yening ngemaling duwen krama :

- a) Yening ketara apisan pacang kekeninin pamidanda akehnyane satus kilo beras
- b) Yening ketara ping kalih pacang kekeninin pamidanda akehnyane satak kilo beras
- c) Yening ketara ping tiga pacang ketundung saking Desa Adat Poh.

Ca : Yening wenten krama desa sane mekarya biota tatkala wenten upacara Dewa Yadnya pacang kakeninin pamidanda inggih punika :

- a) Yening mejaguran ring wewidangan pura pacang kekeninin pamidanda akehnyane satus kilo beras
- b) Yening mejaguran utawi mesiat nyantos ngamedalang rah utawi getih pacang kekeninin pamidanda akehnyane satak kilo beras, turmaning ngresigana ring pura inucap
- c) Yening wenten krama sane purun mebaos sane nenten manut/patut utawi nyagurin jero mangku pacang kekeninin pamidanda akehnyane samas kilo beras, turmaning sang sane melaksana mangda mresihin pemangku inucap.

Ra : Yening wenten krama desa sane ngrusak pura utawi pelinggih :

- a) Yening wenten pelinggih kerusak antuk silih siniggil krama, pacang kasepekan, utawi nenten medadosang mekrama malih.
- b) Yening wenten pura utawi pelinggih rusak mawit saking ngrebah taru utawi sane tiosanpacang kakeninin prabea pagertos pelinggih inucap tur maning kakeninin upacara sane patut kekeniang utawi kemargiang.

Ka : Yening wenten krama sane mademang utawi meboros kedis pacang kakeninin beras selae kilo (25 kg)

Da : Yening wenten krama sane nunjel alas sane nenten kawit abyannyane utawi tegal sane nenten duwennyane, pacang kakeninin pamidanda selae kilo (25 kg)

Ta : Yening wenten krama desa sane ngrabinin wong rabi, kekeninin pamidanda beras akehnyane satak kilo lanang istri.

Awig-awig puniki kalingga tanganin antuk,

Bendesa Adat Poh,

Kelian Banjar Poh,

I Ketut Geria

I Made Ganti

Kepala Dusun Poh,

Perbekel Bhuana Giri,

I Nyoman Madra

I Wayan Mudu